

SARGAH I
DASAR, TETUJON, ARAN WEWIDANGAN,
LAN TETERAPAN

Palet 1

Dasar Lan Tetujon

Pawos 1

Desa Adat Tinungan ngemenggahang dasar Tri Hita Karana manut tatwaning Bhuana Agung. Luwir tatujon Desa Adat Tinungan :

- a. Mikukuhin, nginggilang, gerajegang Sanghyang Agama malarapan antuk nginggilang tata prawertine me Agama Hindu.
- b. Ngerajegang kasukertanning desa saha pawongannya sami malarapan antuk nginggilang pasukadukaan.
- c. Ngerajegang tata sangaskaraning pawongannya, pamekasnya sene ngiket pakeluargayan.
- d. Ngerajegang kasukertaning seraja druen desa miwah druen pawongannya sami.

Pawos 2

Mangda sida molih tatujon kadi ring ajeng, desa Adat Tinungan ngutsahayang dharma laksana desa luwire :

- a. Nyanggra miwah midabdabin desa Adat sajeroning mapewerti antuk nginggilang catur marga.
- b. Ngelimbakang dharma bakti pawongannya sami sejeroning desa Adat.

Palet 2

Aran Lan Wewidangan

Pawos 3

Desa Adat puniki mewasta : Desa Adat Tinungan, sane metu rasa lan wirasa :
Jebar kakuwub wewidangannya mewates kadi ring sor :

- | | |
|-------------------------------|---|
| a. Sisi wetan (Purwa/Kangin) | : Desa Adat Pinge (Pangkung) |
| b. Sisi kidul (Daksina/Kelod) | : Desa Adat Susut (margi Subak Susut) |
| c. Sisi kulon (Pascima/Kauh) | : Desa Adat Kambangan lan Senganan
(tukad Yeh Panahan) |
| d. Sisi lor (Utara/Kaja) | : Desa Adat Tegeh
(margi nuju setra desa Adat Tegeh) |

Pawos 4

Kakuwub Desa Adat Tinungan manut dresta luwire :

- a. Papupulan karang paumahan manggeh palemahan desa Adat.

- b. Kahyangan, Setra, Carik lan tegalan ring kekuwub wewidangan Desa Adat, manggeh telajakan Desa Adat Tinungan.

Pawos 5

1. Awig-awig, perarem-perarem miwah sehanan paswaran desa Adat manggeh kerajegang ring kakuwub wewidangan desane puniki.
2. Awig-awig, miwah perarem-perarem subak-subak ring telajakan Desa Adat Tinungan tan maren manggeh kainggilang.

Palet 3

Wewengkon Lan Teterapan

Pawos 6

1. Wawongkon desa Adat puniki wantah Desa Adat Tinungan.
2. Awig-awig kalih perarem-perarem desane puniki kalingga tanganin olih Bendesa Adat Tinungan, kandugi lumaksana.

Pawos 7

1. Tempekan-tempekan utawi saya-saya kabawos mawak pahan sinanggeh tangan sukuning desa.

SARGAH II

PATITIS LAN PAMIKUKUH

Pawos 8

Desa Adat Tinungan manggehang pamikukuh minekadi :

- a. Pancasila
- b. Undang-undang Dasar 1945 pamekasnya pasal 18
- c. Tri Hita Karana manut sadacara Agama Hindu.

Pawos 9

Patitis Desa Adat Tinungan luwire :

- a. Mikukuhin ngerajegang Sanghyang Agama.
- b. Nginggilang tata prawertine me Agama Hindu.
- c. Ngerajegang kesukertan desa saha pawongannya sekala lan niskala.

SARGAH III

SUKERTA TATA ADAT

Palet 1

Indik Krama

Pawos 10

Sane kabawos Desa Adat Tinungan luwire :

- a. Sahanan sang jenek mapaumahan ring Desa Adat Tinungan, sinanggeh wong desa adat.
- b. Wong Desa Adat inucap linggihnya wenten kalih soroh luwire :
 1. Kaulawarga sane me Agama Hindu tur ngeranjing nyungkemin Kahyangan Tiga, sinanggeh warga Desa Adat Tinungan,
 2. Sejaba punika sinanggeh tamui.

Pawos 11

- 1) Sahanan warga desa sane sampun meperabian/mapikuren, patut tedun mekrama.
- 2) Sinalih tunggil ikrama manut kerendahan kaulawargannya patut keni ayah-ayah mekadi :
 - a. Ayah-ayah ngarep
 - b. Ayah-ayah balu
- 3) Ngawit tedun ngayah yening sampun mererabian/mapikuren mesengker Asasih (1 bulan) sakeng wusan kaupakarain pawiwahan alit (mekalan-kalaan).
- 4) Pengayah ngarep wenang ngerereh penyade yening sampun kapastika antuk pararem luwire :
 - a. Sakitnya tan tinamban.
 - b. Yusannya sampun lingsir manut pamutus paruman .
- 5) Kaulawarga sane me Agama Hindu wiwitan sakeng warga desa sewosan wenang ngeranjing mekrama Desa Adat Tinungan perade pacang jenek mapaumahan ring kakuwub wewidangan Desa Adat Tinungan.
- 6) Sang ayat ngeranjing mekrama banjar penumpang patut atur upeksa ring Bendesa Adat Tinungan/Prajuru Adat, jenek mapaumahannya utawi penumpangannya.
- 7) Yan tan jenek mapaumahan kadi ring ajeng wenang dados penumpang.
- 8) Sulur kalih tatacara ngeranjing mekrama Desa Adat Tinungan, numpang kasulurang manut pamutus paruman.

Pawos 12

1. Sinalih tunggil kaulawarga dados wusan mekrama Desa Adat Tinungan perade kaulawarga inucap :
 - a. Kesah linggih sakeng Desa Adat Tinungan

- b. Kanorayang antuk Desa Adat
 - c. Sampun nyade indik yusa manut perarem.
 - d. Indik wusan mekrama Desa Adat kasulurang manut perarem.
2. Sulus kalih tatacara nganoroyang inucap luwire :
- a. Pastika wenten dosan ipun.
 - b. Tan tinut ring pituduh prajuru indik nyupat raga ngesehin prawerti utawi sedaging awig-awig Desa Adat.
 - c. Katiwakin pamidanda olih Bendesa Adat/prajuru Adat.
 - d. Pamidanda nganoroyoang inucap patut atur uning ring Guru Wisesa.
 - e. Prade sang katiwakin pamidanda inucap rumasa kababatan mangda atur ring guru wisesa.
3. Sang wusan mekrama desa Adat tan wenten polih pahpahan sahananing druwen desa.
4. Desane uwusan mapeweweh pesayuban kesukertan makeluwire marep ring sang kanoroyoang inucap.

Pawos 13

Indik dados malih tedun mekrama desa kasulurang antuk :

- a. Mesadokang raga melarapan antuk ilikita kacihnan ipun kesah sakeng Desa Adat sewosan.
- b. Tinut ring sedaging awig-awig desa Adat, perarem-perarem lan paswara-paswara ring desa Adat.
- c. Patut nauwur jinah dana pawangunan agung alitnya manut pamutus pauman.

Pawos 14.

1. Sehanan warga Desa Adat patut :
- a. Dereda atwang ring desane.
 - b. Tinut saturut ring sedaging awig-awig, perarem-perarem miwah gaguat-gaguat Desa Adat Tinungan.
 - c. Tan maren ngusahayang mangde desa meresidayang nyujur tetujonnya kadi menggah ring pawos-pawos daging awig-awig.
 - d. Natak panes tis kertaning desa.
2. Warga desa sane sinanggeh tamiu patut :
- a. Tinut ring tetuwek desane ngenenin ngupadi kesukertan desa sekala lan niskala
 - b. Tan wenang nungkasin sepemargin kertin desa.

Pawos 15.

1. Sahanan kaula warga desa rauhing sang sinanggeh tamiu patut sareng ngemanggehang kesukertan raga, agama saha druwennya suang-suang.

2. Sahanan kaula warga desa wenang polih pengayoman perejuru manut deresta luwire :
 - a. Sangaskara kahuripannya sane mabuat, sane ngiketang pakaulawargayan.
 - b. Kasukertan miwah kesucian dewek, perhyangan miwah karangnyane suang-suang
 - c. Kabawosin tur katiwakin pamutus sahanan wicarannya.
3. Pengayoman inucap kasulurang manut pamutus paruman Desa Adat.

Pawos 16

Sane sinanggeh ayah balu luwire :

1. Balu remban : balu manut balunyane sane pianaknya kanton alit-alit, ayahannya luwire:
 - a. Yening istri sane balu keni ayah-ayah balu istri.
 - b. Yening lanang sane balu keni ayah-ayah lanang.
2. Balu ngelintik, keni ayah-ayah balu manut balunnya.
3. Balu remban istri wiadin lanang, yening medrue putra teruna/daha, mayusa 17 warsa keni ayah-ayah sawengkul kasulurang manut perarem.

Pawos 17.

Sejeroning ayah-ayah kasulurang luwire :

- a. Dados ngewakilang ring anak siwosan sane sampun truna/daha.
- b. Dados mepuangkid prade wenten kabuatang luwire :
 1. Keni dedauhan sakeng guru wisesa.
 2. Kaluasan.
 3. Memakuh, melaspas wewangunan utawi ngewangun Yadnya siwosan.
 4. Kapiambeng (sungkan, matepetin, kepademang, lan sekancannya).
 5. Keajakang (sang sane ngajak mangda masadokang ring prajuru sapa sira ugi sane kaajak)
- c. Dados mopog / ngowot ayah-ayah luire :
 1. Dados pegawai pemerintah.
 2. Magingsir genah jenek ngrereh pangupa jiwa ring Desane sewosan.

Pamutus tata carane inucap manut pamutus paruman/perarem.

Pawos 18.

1. Sanalih tunggil ikrama sane medrue putra lintangan ring adiri tur sane sampun mapikuren, wantah asiki sane wenang nyeledii ayah-ayah reramannyane, sane siwosan patut tedun mekrama.
2. Nyulurang tedun mekrama kalih rerebahan sehananing ayah luwire :
 - a. Ngawit tedun mekrama kebyaktayan ngangge paruman Patoka marep ring ayahan ngarep
 - b. Ngetangang paremangkin, marep ring ayahan balu.

3. Sahanan wusan mekrama keetangan paremangkin.
4. Ngangken panumayan inucap (paruman patokan) patut prajuru desane ngawantunin nyahcah jiwa, ngetangang kalih mastikayang pekraman miwah ayah-ayah kadi ring ajeng.
5. Kepastikayang cacah jiwa pamekas indik pekraman miwah ayah-ayahan kapikukuhin antuk pamutus paruman desane dumugi kengin kelaksanayang.
6. Kepastikayang inucap digelis kesuratang ring ilikita desa (buku daftar anggota karma adat).

Pawos 19.

1. Peturunan ikrama Desa Adat Tinungan sejeroning ngupadi kasukertan desa kasulurang luwire :
 - a. Gayah ngarep keni Pensawungkul.
 - b. Pengayah balu ngelintik keni atenga (0,5).
 - c. Taruna kwasa lan daha pateh keni sawungkul (manut perarem desa)
2. Pepeson ikrama Desa Adat kasulurang luwire :
 - a. Pengayah ngarep keni sawungkul.
 - b. Pengayah balu ngelintik keni atenge (0,5).
 - c. Pengayah balu remban keni atenga manut balunyane.

Pawos 20.

1. Desane mepaweh leluputan ayah-ayah utawi pepeson ring sang kawelas asih.
2. Sor singgih laluputan miwah bacaan sang luput, kaunggahang ring perarem desane.
3. Sejeroning prajuru Desa sane pastika polih laluputan pamekasnya :
 - a. Para sedaka, mekadi Pemangku kahyangan, penyarikan desa lan penyade.
 - b. Para serati lan seruti.
 - c. Sang sungkan tahunan tan keneng tinamban.
 - d. Sang ceda angga.
 - e. Wong alit ubuh meme bapa.

Pemastika inucap manut pamutus paruman Desa Adat.

Palet 2

Prajuru

Pawos 21.

Desa Adat Tinungan puniki kaenterang olih prajuru-prajuru luwire :

- a. Bendesa Adat.
- b. Petajuh pinaka wakil
- c. Penyarikan pinaka juru surat.
- d. Patengen pinaka pangemong seraja druwen Desa Adat.

Pawos 22.

Sane dados patut kapilih madeg parajuru Desa Adat luwire :

- a. Warga Desa Adat Tinungan.
- b. Warga pecak dura desa tur sampun ngeramanin banjar/desa adat sekidiknya dasa warsa (10 tahun)
- c. Mayusa sekidiknya tigang dasa warsa (30 tahun).
- d. Teleb ring sastra, agama, dresta miwah arasan tetimbang tur tan nyingsalin pemargin petites lan pamikukuh kadi ring ajeng.
- e. Tan ceda angga.

Pawos 23.

Swadharmaning prajuru-prajuru Desa Adat luwire :

- a. Ngenterang paruman Desa Adat.
- b. Ngenterang pengelaksana daging awig-awig miwah pemutus paruman.
- c. Ngeraksa saha midabdabin tataning ngange seraja brana druwen desa adat.
- d. Ngenterang saha nuntun baranane ngupadi kesukertan desa sekala lan niskala.
- e. Nuntun saha nyaksinin tatacara miwah sangaskaraning kahuripane mabuat, sane ngilitang sulur pakulawargayan.
- f. Nuntun saha ngenterang ikrama desa ngupadi nginggilang sanghyang agama, kasucian kahyangan, kasucian pawongan, kasucian palemahannya miwah tatacara ngangge setra.
- g. Mawosin miwah niwakang pamutus marep ring wicara desa.
- h. Ngewakilin desa ngatemuang bawos ring sapa sira ugi.
- i. Sumakuta natak panes tis ring indik swadharmanya suang-suang.
- j. Swenya ngemargiang swadharmanya Bendesa Adat 5 warsa (limang tahun).

Pawos 24.

Olihan-olihan parajuru-parajuru Desa Adat luire :

- a. Upah tanah pecatu, kwehnya manut pamutus paruman desa adat.
 - b. Laluputan pakenan-kenan, manut pamutus paruman.
 - c. Angkepan duman ring desa adat.
 - d. Miwah olih-olihan sewosan manut pamutus paruman desa.
- Olih-olihan parajuru-parajuru inucap manut dadudonan.

Palet 3.

Indik Kulkul

Pawos 25

1. Kulkul desa adat piranti/serana, tetengerannya kabuatang anggen wangsit ring wewidangan desa adat Tinungan
2. Kulkul desane tan wenang katepak, yan tan manut kadi daging awig-awig puniki.

3. Tabuh tetepakan kulkul desa pastika masewos-sewosan, manut kadi tetujonnya luwire :
 - a. Tengeran ngawit ngelaksanayang pakaryan kadi sampun kedauhin utawi wenten sesiar.
 - b. Wenten sinalih tunggil warga desane sane seda/padem.
 - c. Tengeran warga desanye kapalegendang.
 - d. Tengeran upacara desa.
 - e. Tengeran wenten sinalih tunggil warga desane kemalingan
 - f. Tengeran wenten iwarga desanya kaamuk, kebegal, keaak, keni baya miwah baya, baya patine sewosan.
4. Kulkul desane tan wenang ketepak yan ten wenten polih kebebasan utawi pituduh prajuru desa manut dedudonan sejawaning rikala pacang ngawentenan tenger ngenenin kadi manggeh ring ajeng .
5. Sang tepak kulkul tan sangkanin pituduh , patut digelis atur supeksa ring prajuru saha buat penenakannya kadi ring ajeng.
6. Sehanan kulkul desane ring Desa Adat Tinungan patut katepak nyarengin, prade wenten sinalih tunggil kulkul desane sewosan nyihnayang kebayapati.
7. Suaran kulkul tengeran, pekaryan patut katedunin antuk ayahan manut kadi daging/ dedauhan arahane (sesiar)

Pawos 26.

Tabuh tetepakan kulkul ring Desa Adat Tinungan kasulurang luwire :

1. Tengeran upacara yadnya ring kahyangan, ngayah suka duka, ngayah gotong royong, sangkep sane mejalaran antuk dedauhan utawi sesiar prajuru.
Tepakannya : atuludan pinih ajeng alon selanturnya atuludan gelis, lan atuludan pinih ungkar alon.
2. Tengeran pemargi Ida Betara ring kahyangan rikala piodalan tepakannya : nyumpang (tabuh kalih)
3. Tengeran silih sinunggil ikrama desa kalayu sekar utawi padem tepakannya : atuludan alon ping tiga (o o o).
4. Tengeran jiwa baya, baya pati utawi kaamuk tepakannya atuludan ping tiga nurun bulus lan selanturnya.
5. Tengeran arta baya lan duracara agama tepakannya : atuludan bulus lan selanturnya.

Palet 4.

Indik Paruman

Pawos 27.

1. Luwir peparuman ring Desa Adat Tinungan :
 - a. Paruman Desa Adat.

- b. Paruman Parajuru-parajuru.
2. Sahanan paruman sida kalaksanayang yan katedunin antuk sang patut nedunin langkung ring atenga akeh ipun.
3. Sehanan pamutus kautsahayang pisan, mangda malarapan antuk gilik saguluk pasuaran, bilih-bilih tan mresidayang suarane makeh siananggeh pamutus.
4. Suang-suang ikrama adat sane ngerauhin peparuman inucapwenang ngangge busana adat (meamed).
5. Ring sehanan peparuram tan maren kamanggalaning ilen ngarcanan Ida Bhagawan Penyarikan saha Widhi Widana (canang Pengerawos lan cane)

Pawos 28.

Tataning paruman ring wewidangan Desa Adat Tinungan luwire :

1. Paruman Desa Adat Tinungan patut ngawentenang nangken enam bulan sapisan inggih punika :
 - Dina Wraspati
 - Wara Pahing
 - Wuku Julungwangi
2. Nangken paruman inucap Bendesa Adat patut nyiarang pemargin ngenterang adat pemekasnya ngenenin indik :
 - a. Unjuk lungsu Adat muanh ayah-ayahan.
 - b. Pemargin penelesan miwah sulur arta berana druwen desa adat.
 - c. Pemargin usaha-usaha sane mabuat.
 - d. Sehanan wicara saha pamutusnya.
 - e. Daging perarem-perarem miwah pasuaran sane mabuat.
 - f. Rencana prajuru indik usaha kartin Desa Adat kepungkuran.
 - g. Miwah sane sewosan.
3. Sehanan sesiar ring ajeng katitenin saha ketiwakin pamutus ring paruman desa.
4. Pamutus paruman inucap ring ajeng sinanggeh se[pat siku-siku sane patut kasungkemin saha katinutin olih kaula warga desa adat sami.
5. Sejaba sane menggah ring ajeng, paruman desa adat patut kawentenang perade kawadi olih ikrama, sanistane sareng epah tiga papupulan karma desa adat.
6. Sang ngawidhi patut pastikayang tatuwek sane sandang kebawosang ring paruman sane ngenenin likita kerahajengan.
7. Prade prajuru Desa Adat sampun peratiasa pisan, taler patut ngawidhi ngawentenang paruman Desa Adat inucap.
8. Paruman Desa Adat inucap, taler kawikanin pamutus kadi menggah ring ajeng.

Pawos 29.

1. Paruman prajuru desane patut kewentenang sanistane tigang sasih apisan.

2. Paruman inucap katuntun olih Bendesa Adat.
3. Paruman prajuru kawentenang wantah ngerincikang tata upaya pagunadika ngelaksanayang usaha pengarcana saka luwire.
4. Sahanan rerancangan, tan wenang kelaksanayang sadurung kapikukuhin antuk pamutus paruman Desa Adat manut dadudonan.

Palet 5
Indik Pedruwen Desa

Pawos 30.

Padruen Desa Adat Tinungan luwire :

1. Kahyangan Desa luwire :
 - a. Kahyangan Puseh.
 - b. Kahyangan Desa / Bale Agung.
 - c. Kahyangan Dalem.
 - d. Kahyangan Natar Jeruk
 - e. Kahyangan Dalem Tatag.
 - f. Kahyaangan Melanting
 - g. Kahyangan Tapakan Ratu Gede
2. Pelaba Pura lan dedudonannya desa adat patut kaenterang olih prajuru Adat manut Pararem.
3. Pikoli utawi upon-upon pelaba pura inucap mangde katinasang kepastikayang kabuatannya anggen prebayan kasukertan desa sekala lan niskala.
4. Pelaba Pura tan wenang keadol miwah kegadeang olih sapisira ugi.

Palet 6.
Sekerta Pamitegep.

Kaping 1
Karang, Tegal lan Carik
Pawos 31

1. Sehanan karang paumahan patut :
 - a. Pastika wenten watesnyane.
 - b. Mapemedal kerurung.

Sapunika taler tegal lan carik mangde pastika watesnyane.
2. Bendesa Adat patut ngutsahayang mangde sami pekarangan warga desa Adat kadi inucap ring ajeng.
3. Sahanan ikrama patut ngewatesin karangnyane suang-suang jantos side trepti nyatur desa.

4. Wates karang sane mejepitan patut kategen olih ikrama sane mahuluan ke wates manut dresta.
5. Telajakan karang suang-suang patut kapiara olih ikrama sane neruwenang karangnyane
6. Margi ring Desa kapiara olih ikrama desa adat'
7. Taru miwah woh-wohan sane maurip ring wates kadi ring ajeng kadrueang olih sane negen inucap.

Kaping 2

Pepayonan

Pawos 32.

1. Tanam tuwuh sakaluwire miwah tatacara ngangge karang, tan wenang ngungulin utawi nepen, miwah ngawinang pocol karang penyandingnya.
2. Parade wenten kadi inucap (1) wenang katepas gantungan saha katelasin olih ikrama sane madrue tanam tuwuh sane memayen inucap, saha tatacarane :
 - a. Ikrama sane medrue tanem tuwuh sane mayanin penyanding, atur uning ring prajurunnyane mangde rikala nelasin (notor) ngebah lan sekancannyane kejantenang.
 - b. Atur uning ring prajuru, nunas tempo panumayan pacang mekarya nelasin.
 - c. Sadurung lintang tempo, parade tanam tuwuh tetangunan sane memayanin penyanding inucap rubuh (tan praja muga antuk linuh, angin, sabeh lan sekancannya). Sang medruweang luput sakeng kaiwangan.
 - d. Tanem tuwuh, tetangunan sane rubuh punika wenang kataban olih sang keni baya.
3. Sakaluwire ring tanam tuwuh miwah tetangunan sane ngunggulin utawi mayanin penyanding panyepat gantungan wenang maren (ngajeroang adepa agung) : 2, 50 meter sakeng wates.
4. Sakaluwir tanam tuwuh miwah tetangunan ikrama ring pekarangannya rubuh megapit tetangunan ikrama siwosan, yadnyan sejeroning pakarangannya miwah tetangunan penyandingnye, patut ikrama inucap negen preyan pengeskarannya, yan sang keni baya inucap sampun atur upeksa ring prajuru adat.
Sapunika taler tanam tuwuh utawi tetangunan sane mayanin inucap kabukti antuk sang keni baya
5. Taler tan wenang mekarya loloan toya pengutangan ke karang penyandingnya, sapunika taler indik luu-luu.
6. Yaning wenten tanam tuwuh sane ugi patut katepas (ketebang) patut penyandingnye sane ugi mebaya, numbas/nganti penumbasan urip tanem tuwuh inucap agung alitnya manut pamutus panubayan sang kalih (hasil musyawarah mufakat), utawi kepastika olih prajuru Desa Adat.
7. Krama desa mangde ngajegang keasrian (kelestarian) pepayonan ring pelemahan desa.

Kaping 3
Nyulurang Wewangunan
Pawos 33.

1. Nyabran ngewangun patut :
 - a. Mesadok ring prajuru desa Adat parede wewangunan inucap ngenenin wates.
 - b. Ngangge asta bumi, geguluk asta kosala kosali
 - c. Mangde nenten nyayubin penyanding utawi pisaga.
2. Parade wewangunan inucap nyayubin penyanding, bilih-bilih capcapannya ring tengahing wates, wenang kagubat utawi mangde ngangge abangan,

Kaping 4
Indik Margi.
Pawos 34

1. Margi ring Desa Adat Tinungan luwire :
 - a. Margi ageng : Jalan Raya padruwen guru wisesa.
 - b. Margi Desa Adat pinaka margi rauhing kasetra.
2. Indik banjar Adat miwah rurungnyane sampun wenten patut kamegahjang.
3. Margi desa Pakranman malinggah paling alit 3 meter, lan paling ageng 6 meter manut kadi kabuatannya.
4. Alit malinggah 2 meter utawi ngelintangin manut kabuatannya.

Kaping 5
Indik Dusta.
Pawos 35.

1. Laksana sane sinanggeh dusta, bacaannya luwire :
 - a. Jiwa baya
 - b. Arta baya
 - c. Geni baya
 - d. Palagandangan
 - e. Nastika utawi dura cara agama
2. Sahanan warga desa parade uning ring kewentenan jatma dusta ring sejeroning desa Adat Pekramannya patut gelis atur uning ring prajuru.
3. Bilih-bilih mabuat pisan kawentenannya sang uning mangde digelis napak kulkul desane manut kadi rupan pengelaksanaan dustane.

Kaping 6
Penyanggran Banjar
Pawos 36.

Krama desa rikala ngewentenang karya suka duka patut kasanggra olih banjar adat luwire :

1. Parade ngewangun pitra yadnya utawi manusa yadnya manut pinunas sang meyadnya.
2. Pekaryan druhen sinalih tunggil ikrama sane mabuat tatacara penyanggrannya kasukserahang ring banjar.
3. Desane patut medarsana antuk rasa perama tulang ring sang nangun karya, nangging tan maren miteketang kasusatian karamane ring desa Adat.
4. Bilih karyane baat, bobot, desane wenang ngererh petulung ring desa adat sewosan.
5. Pekaryan sane patut kesukserahang ring penyanggran banjar luwire :
 - a. Ngupakara sawa.
 - b. Sahanan panca yadnya.
 - c. Miwah pakaryan sane sewosan sane manut ring daging pararem desa adat
6. Pekaryan sinalih tunggil ikrama adat, rikala ngangge penyanggra desa patut nawur batu-batu agung alitnya manut pamutus paruman.
7. Sinalih tunggil ikrama desa adat ritat kala ngemargiang swadharman penyanggran desa, ritepengan karya patut ngangge busana adat (meselempot).
8. Yaning wenten sinalih tunggil kaula warga desa nanggun karya panca yadnya, kasulurang manut kabuatanya lan pinunas sang meyadnya, penyanggran ikrama ngeromba manut pamutus paruman (Pararem).

Kaping 7
Wewalungan
Pawos 37.

1. Tan wenang ngelumbar wewalungan (pamekas sakeng wewalungan bawi, banteng, kambing, kebo/misa, kuda) miwah sane tiosan ring pekarangan, bilih-bilih jantos ngerusak pekarangan warga siwosan, miwah margi.
2. Sehanan warga desane sane miara wewalungan patut, sayaga nitenin negul/ngelogor mangda wewalungan inucap tan ngerusak (1) ring ajeng, bilih-bilih mangde sampunang jantos ngeranjing ngeletehin kahyangan.
3. Prade wenten wewalungan ngeleb saha ngeranjing kepekarangan warga sewosan, sang madruwe karang sane karanjingin patut malungguhang ring sang madruwe wewalungan inucap. Bilih-bilih yan jantos ngawinang karusakan mangda nunasang pematut ringprajurune. Iprajuru wenang ngentosin pematut tur niwakang pamidanda, agung alit manut dosannya.

4. Ring asasihjantos ping tiga malungguhang wewalungannyane, wenang kataban, sang naban patut atur uning ring prajuru. Tetabanan inucap wenang kapiara oleh prajuru sadurung katebus alih sang maderuweang.
5. Sang madruweang wewalungan inucap patut nebus, agung alit panebusannya, katiwakang olih prajuru kadulurin antuk danda-danda makarucakan sane kametuang miwah pabyan salami ketaban inucap.
6. Bilih ring asasih jantos ping tiga mataban kadi ring ajeng wewalungannya wenang kaambil, tan wenang katebus, pemargin taban punika melarapan antuk pamutus prajuru manut daging perarem Desa Adat Tinungan.
7. Prade wewalungan sane ngeleb tur ngeranjing ke kahyangan , sang madruweang wewalungan inucap kasisipang antuk danda prabeya upakara pamarisudha manut pamutus paruman, agung alit upakara manut pamastika Smerti Agama.
8. Yan wenten wewalungan sane keni palungguhan bilih-bilih jantos kataban nangin tan wenten sane ngangkenin masuwe tiding rahina patut wewalungan inucap keaturang ring prajuru Desa Adat selanturnya I prajuru ngawentenang sesiar ke desa sewosan rawuhing guru wisesa. Risampun pengelaksana inucap kamargiang, taler tan wenten jadma mariangken jantos lingtangan ring kalih wuku, wewalungan inucap wenang kalelang (keadol) tur panebusannya kaduwenang manut pamutus paruman desa.
9. Yening wewaungan inucap padem tan sangkaning kekardinin sajeroning kanton kataban, sang naban tan wenang ngarsayang parabeya ring sapasira ugi.
10. Tata cara malungguhng/naban miwah nebus, patut melarapan antuk sahunging miwah sapatuduh prajuru Desa Adat.
11. Yening wenten wewalungan sane ngeleb ngeranjing ke pekarangan warga sewosan tur kabayanin utawi kepademang oleh sang madruweang karang patut sang melaksana mabaya inucap kakenein pamidanda. Agung alit pamidanda inucap manut awig-awig miwah daging perarem Desa Adat.
12. Yening wenten sang melaksana, tan manut kadi ring ajeng patut keatur uning ring guru wisesa.
13. Yening wenten wewalungan keni baya/padem ring pekarangan warga sewosan saha sang madruweang karang tan melaksana mebaya/memademang, sang inucap kasulurang manut perarem.
14. Yening wenten wewalungan ketaban tur padem ring sajeroning ketaban taler sang madruweang wewalungan inucap merasa sumadia ring sang naban/nganggo tatabanan inucap sang naban lan sang madraruweang inucap kasulurang manut perarem.

SARGAH IV.
SUKERTA TATA AGAMA

Palet 1.
Dewa yadnya.

Pawos 38.

1. Ring wewidangan desa adat Tinungan wenten kalih penyiwian luwire :
 - a. Penyiwian desa adat sane kasungsung olih ikrama adat sami.
 - b. Penyiwian pekuluwargian, sane kasungsung kaulawargannya.
2. Penyiwian desa Adat luwire :
 - a. Kahyangan Puseh
 - b. Kahyangan Desa/ Bale Agung
 - c. Kahyangan Dalem Gede
 - d. Kahyangan Melanting
 - e. Kahyangan Dalem Tatag
 - f. Kahyangan Dalem Natar Jeruk
 - g. Kahyangan Tapakan Ratu Gede
 - h. Kahyangan Ulun Setra.

Pawos 39.

- 1) Tan wenang ngeranjing ring Kahyangan Desa Adat Tinungan luwire :
 - a. Jadma luh sebel kandel (ngeraja Swala, wawu madruwe putra during tutug asih pitung rahina karuron) lan sane lanang sadurung kepus udel.
 - b. Jadma cuntaka sakeng pepademang, sadurung tutug panglimigian.
 - c. Yening wenten jadma astra, wong bobot, pesanggama tan sinangaskara, wong mamitra ngalang, wong edan, miwah cendala sewosan sadurung kaprayascita manut linggih agama Hindu.
 - d. Jadma sane kapastikayang panten antuk prajuru.
 - e. Sato agung, ngawit sakeng bawi lantur ring satone agengan (suku pat) sejawining pacing kabuwatang jadinya.
 - f. Sehanan barang punapi luwire sane sinanggeh letuh manut linggih agama Hindu 9tulang, getih, bok, sakeluwire watang, layudan pitra yadnya lan sekancannya).
- 2) Paratingkah sane tan kayogya(tan dados) ring kahyangan liwire:
 - a. Yan tan mabusana adat
 - b. Mebacin, mewarih(sajawining sane kantun rare)
 - c. Melaksana wiadin mebawos kasar sane kaucap letuh, masenggama.
 - d. Magambahan rambut(sejawining para sutra/pemangku rikalaning kalinggihan Ida Bhatara)
 - e. Macingcingan/mecikang wastra, manemah, mamisuh, marebat lan majaljal.

- f. Ngeranjing, tedun ring palinggih/panyengker pura yening tan polih penugrahan sakeng prajuru/pemangku.
 - g. Tan dados mawodak.
- 3) Parabyan ngaci manggeh kabuwatang Desa adat Tinungan kamedalin olih Desa Adat Tiungan.
 - 4) Panumaya Widhi Widana Desa Adat Tinungan sakaluwire kasulurang manut Perarem.

Pawos 40.

1. Keramane sane memanggihin utawi uning munggwing jadma sane ngeleluhin Kahyangan kadi ring ajeng patut atur uning ring prajuru.
2. Perade tan wenten nyadokang, punika mawasta sailon ring sang corah.
3. Perade tan wenten katinutin, utawi mamurub larangan inicap ring ajeng wenang kasisipan, pamidanda manut pamutus paruman desa.

Pawos 41.

1. Prajuru patut ngemegahang indik sane wenang nyanggra-nyanggra utawi sane patut pingitang kesuciannya upami : Arca, pengawin lan selanturnya.
2. Prajuru patut ngemegahang, pemangku-pemangkune sane yoga munggah tedun miwah ngiasin pralingga-pralingganya.
3. Prajuru tan maren nureksanin nitenin, mangda pemangku-pemangku, penyade-penyade lan sutri rajeng nganutun sesananya.

Pawos 42.

1. Prajuru patut mastikayang indik piodalan-piodalan aci-aci ring kahyangan panyiwian desa adat, agung alit tata pengelaksanaannya manut pamutus paruman.
2. Yening wenten upacara ngusaba desa lan ngusaba nini, prajuru-prajuru patut ngemanggehang perhyangan-perhyangan ring sejebag desa Adat Tinungan. Tata cara ngastitiang kasuciannya mangda nganutin pidabdab desa.
3. Yan tan anut kadi mengga ring ajeng paralingga kahyangan inucap tan dados kasarengin rikala samuha/nyejer ring Bale Agung, rikala pangusungan, pangusaba miwah upacara-upacara sane sewosan.

Palet 2

Kasucian/kasukertan Desa

Pawos 43.

1. Prajuru nuntun, mangda upakara widiwidana desa Adat ngemegahang sesidannya, agung alitnya anutang ring kewentenannya, upami : Galungan,

- Sugihan, Kuningan, Siwa Latri, Ngusaba Desa, Ngusaba Nini, Tawur Kesangga lan Rerahinan-rerahinan siwosan manut lingging agama Hindu
2. Parade wenten cihna kedurmanggalaning jagat, prajurune digelis ngutsahayang pamarisuda pengaci desa manut lingging Agama Hindu.

Pawos 44.

Nyabran rerahinan ikrama desa patut nyuciang kahyangan lan Adat antuk ngaturang wangi.

Pawos 45.

Piodalan (petirtan) ring suang-suang kahyangan luwire :

- | | |
|--------------------------------|----------------------------|
| a. Ring Pura Puseh | : Anggara Kasih Prangbakat |
| b. Ring Pura Desa (Bale Agung) | : Anggara Kasih Medangsia |
| c. Ring Pura Dalem Gede | : Buda Cemeng Ukir |
| d. Ring Pura Dalem Natar Jeruk | : Buda Umanis Kulantir |
| e. Ring Pura Dalem Tatag | : Purnamaning Sasih Kapat |
| f. Ring Tapakan Ratu Gede | : Anggara Wage Dungulan |
| g. Ring Pura Melanting | : Saniscara Kaliwon Wariga |
| h. Ring Pura Ulun Setra | : Buda Cemeng Ukir |

Rikala petirtan inucap keanjekan Purnama utawi Tilem patut kelaksanayang Petirtan Jelih, agung alitnya manut kecap sastra agama Hindu lan pamutus paruman desa, sejawaning wantah mula keanjekan Purnama/manut deresta.

Pawos 46.

Rerahinan-rerahinan sane patut ketah kemargiang aci inggih punika :

1. :
 - a. Purwanining Tilem kepitu : kewentenang upacara Siwa Latri
 - b. Tilem kesanga ring desa Adat Tinungan patut ngewentenang pecaruan (Tawur Kesanga) manut pamutus perarem.
 - c. Ring pemedalan suang-suang patut nancep sanggah cucuk medaging aci manut deresta.
 - d. Benjangane ikrama desa Adat patut ngemargiang Catur Brata Penyepian, sane melaksana piwal kadi ring ajeng patut kesisipang tur kedanda olih ikrama desa manut pamutus paruman.
2. Rerahinan Sugihan, Galungan, Kuningan, patut ikrama desa Adat ngaturang pengaci saha ilen ipun ring kahyangan-kahyangan desa miwah ring pakubonnya suang-suang.
3. Nyabran Galungan iwarga desa Adat patut memenjor saha nanceb sanggah cucuk ring ulu pemedalannya suang-suang.
4. Indik rerahinan inucap, mapegamel ring sastra agama.

Palet 3
Resi yadnya

Pawos 47.

1. Sang pacang mepogala/medwijati sejawaning nunas panugrahan ring sang rumawos (Parisada Hindu Dharma) utawi guru wisesa taler patut masadok ring Bendesa Adat.
2. Prajuru desa adat inucap, patut sareng nureksain mangda sulur kalih pemarginne yakti-yakti ring kecaping agama Hindu sane patut ktureksanin pinih ajeng kaceda angga, miwah kemulusan wesanan mahuripannya.
3. Prade wenten sinanggeh kantun kamer prajuru inucap patut ngatur uning ring sang rumawos (Parisada Hindu Dharma) utawi Guru Wisesa.
4. Prajuru desa Adat inucap patut sareng nyaksinin pemargin upacanyanya.

Pawos 48.

1. Sang sulinggih patut ngerajegang sepolah palih yadnya sajeroning wewidangan desa adat, sesampune wusan wawu muputang yadnya kebanjar/desa adat sewosan, utawi manut kabuwatang.
2. Karma banjar patut sareng nitenin utawi midabdabin panuntun olih prajuru banjar desa adat mangda sehanan yadnya sane kawentenangnya kaicen pamuput olih sang Sulingih(Pandita utawi Pinandita) manut kawentenannya.

Pawos 49.

1. Ring Desa Adat Tinungan kewentenang Pemangku, Serati lan Sutri.
2. Pemangku, Serati lan Sutri kaedegang melarapan antuk :
 - a. Ngelingin sakeng keturunan.
 - b. Kapilih olih krama desa adat.
 - c. Sakeng Nyanjan.
3. Sejeroning ngelaksanayang swadarmen : Pemangku kengin kesanggira olih penyade mangku, manut kabuatang desa adat.
4. Prabayan upakara ngewintenang(adhiksa widhi) marep ring pemangku penyade, sutri lan serati kamedalin antuk karma desa adat manut pamutus paruman.
5. Prabayan upakara Pitra Yadnya maren ring Pemangku, Penyade, serati lan Sutri inucap, ring sedanya kapungkuran sajawining kemedalin olih kawula warganya taler wenten dharma sedana desa adat manut pamutus pararem.

Pawos 50.

1. Swadarmen pemangku/penyade ring Desa Adat Tinungan Luwire :
 - a. Nuntun, ngenterang krama desa ngemenggahan kesucian kahyangan.
 - b. Munggah tedun ring palinggih kahyangan penyiwaan desa miwah ngiasin pralingga-pralingga, manut dudonan lan pemastikannyane.

- c. Nuntun saha nabdabang ilen krama desa ring kahyangan penyiwian desa adat.
 - d. Nyanggra pemangku-pemangku sejeroning ngilenenang upakara yadnya desa.
 - e. Miwah sane tiosan ngerangkul upakara yadnya desane.
2. Swadarmaning Sutri tan mari ngemanggehang kasucian
 3. Olih-olahan Pemangku, Penyade, Serati lan Sutri kasulurang manut pamutus perarem desa adat.
 4. Pemangku, penyade serati lan sutri tan kenging keadegang luwire:
 - a. Sang ceda angga(buta, bongol lan sekancannya)
 - b. Gering ila(edan, ayan lan sekancannya)
 - c. Ngastika(tan nugonin Sanghyanga Agama)
 - d. Himsa Karma(ngemademang sesame jadma)
 5. Nyuwudang pemangku, penyade, serati lan sutri kasulurang manut pamutus perarem desa adat.

Palet 4 PITRA YADNYA.

Pawos 51

1. Desa Adat Tinungan nitenin sinalih krama ngelaksanyang pitra yadnya.
2. Tata cara penyanggran Desa, kasulurang manut perarem.
3. Sinalih tunggil krama kepadaman/ atiwa-tiwa mangda masadok ring prajuru.
4. Sang tungkas/piwal ring pidabdab Desa keni danda manut perarem.

Pawos 52.

1. Yening wenten iwarga desa adat kelayu sekar utawi padem, sesebelan desane ngawit sakeng mapendem jantos mapreyascita.
2. Yening ring desa adat wenten upacara atiwa-tiwa/ngaben tur nenten ngelanus sesebelan desane ngawit sakeng pakutangan/pelebonya.

Pawos 53.

Sane tan keni cuntaka luwire :

1. Sang sulinggih, sang Pinandita, pemangku kahyaangan tiga.
2. Rikala petirtan ring kahyangan, risampun ngalang tengah/sedeng menmen.

Pawos 54.

Indik mendem utawi ngeseng sawa kasulurang luwire :

1. Genah mendem/ngeseng sawa, sang meagama Hindu ring wewidangan Desa adat Tinungan kewastanin setra/tunon.
2. Setra Desa Adat Tinungan kepah dados kalih (2) luwire :

- a. Setra Alit
 - b. Setra Ageng.
3. Sang sane pacang ngangge setra/tunon, patut nunas kebebasan ring Bendesa Adat/Kelihan Adat sah tatene ngangge setra manut kadi dresta miwah pituduh guru loka.
 4. Warga Desa Adat patut ninutin, mangda sehananing sinanggeh letuh setrane tan wenten ngelahlah/kebakta ke desa Adat, bilih-bilih ke kahyangan luwire tulang belilit, payuk lan sane sewosan.

Pawos 55.

1. Pidabdab ngangge/mendem sawa kesulurang luwire :
 - a. Kepastika tan dados nginepang bangbang genah mendem sawa.
 - b. Sawa wong rare sane durung tumbuh untu, durung tigang sasih (105) rahina patut kependem : premangkin tan ngetang pedewasan.
 - c. Sejeroning desa Adat Tinungan pacang mendem/ngeseng/ngaben sawa/atiwa-tiwa lintangan ring adiri /papupulan ring rahina lan setra tunggal, patut sane pinih tampekan genahnya ring setra rihinang ngemargiang (memargi).
 - d. Jadma padem nandang sakit ila, sawannya kapendem ring setra.
 - e. Jadma padem salah pati, ngulah pati, sawannya sedurung kapendem dados ngeranjing kepakubonannya.
2. Setrane kasinanggeh ngelikadin patut kagubar olih ikrama banjar saha kaenterang olih prajuru tan kewicaraning malih.

Pawos 56.

1. Prede wenten sawane kapendem/kageseng ring tunon boya wantah warga Desa Adat patut keluarganya nawur penanjung batu/penukun setra, agung alitnya manut Pararem.
2. Sapasira ugi mendem sawa/ngeseng sawa, patut ring sertra tan dados ring karang paumahan, tegal lan sane sewosan.

Pawos 57.

1. Krama sane pacang atiwa-tiwa patut nunas kebebasan ring prajuru desa utawi guru loka.
2. Prajuru inucap nitenin tur nuntun mangda warga punika tinas tan nyantulin kesucian desa utawi kahyangan.
3. Pidabdab nitenin utawi nuntun kadi inucap, kaenterang luwire : prade wenten jadma padem sejeroning masengker 7 (pitung) rahina dados keaben /atiwa-tiwayang, sejawaning ring bebanjaran wenten kabuatang banjar luwire : manut dresta lan pamutus paruman desa.

Pawos 58.

1. Bacakan yusan jadmā sane kengin lan tan kengin kaupakarain atiwa-tiwa luwire :
 - a. Sawa wong rare sane durung mayusa 3 (tigang) sasih, tan kengin katiwa-tiwa.
 - b. Sawa wong rare sane mayusa langkungan ring 3 (tigang) sasih durung ketus untu dados keaben ngelungah.
2. Pekaryan atiwa-tiwa utawi upakara sane patut kapeserah ke banjar/desa.
3. Banjare/desane sumukuta nyanggra utawi nguwehin bebesan manut daging awig-awing desa adat.

Pawos 59.

Sane katiben cuntaka :

1. Cuntaka kelayu sekar / padem luwire :
 - a. Sang sane madruwe kalayu sekar
 - b. Kaluwargannyane
 - c. Bebanjarannya,Kewentenannya manut kadi daging kesatuan tafsir aspek-aspek agama Hindu.
2. Cuntaka ngeraja swala : Sang sane ngeraja swala.
3. Cuntaka ngembasang putra, kawula warga sang ngembas putra lanang lan istri.
4. Cuntaka pawiwahan luwire : Sang sane mewiwaha (lanang lan istri).
5. Cuntaka karuron : Sang sane karuron.
6. Cuntaka gamia gamana, salah timpal luwire :
 - a. Sang sane ngelaksanayang
 - b. Desa adatnyaane
7. Cuntaka ngembas putra tan sinangaskara luwire :
 - a. Sang ngembas putra.
 - b. Putrannya.
 - c. Yening wenten anak lanang kapariangken, mejalaran antuk bukti sane lanang.

Palet 5

Manusa Yadnya

Pawos 60

1. Desa Adat Tinungan nitenin sinalih tunggil ikrama ngelaksanayang manusa yadnya manut kabuatannya.
2. Tata cara pengelaksana manusa yadnya ring desa Adat Tinungan ngemanggehang dresta desa, tur kapikukuhin olih ikrama desa manut perarem.
3. Sang pacang ngelaksanayang manusa yadnya sane mabuat mangda masadok ring Prajuru.

4. Sang tungkas ring pidabdab desa keni danda agung alitnya manut pamutus paruman.

Pawos 61.

1. Upacara manusa Yadnya madudonan sekadi ring sor :
 - a. Magedong-gedongan duk pengerempinian I biang.
 - b. Duk sang mereka medal (medapetan).
 - c. Kepus udel
 - d. Tutug kambuhan (42 rahina).
 - e. Nigang sasihin (tigang sasih) 105 rahina.
 - f. Pawetuan / oton odalan (enam sasih).
 - g. Tutug kelih (ngeraja swala wedana), ngembakin lanangnya.
 - h. Metatah / mapendes.
 - i. Mewiwaha,
 - j. Mewinten.
2. Upacara-upacara inucap nista, madya, utama, manut sastra agama saha catur dresta, maka buatan dresta desa nista ngawinang simacara desa.

Palet 6

Bhuta yadnya

Pawos 62.

1. Desa Adat Tinungan ngelaksanayang Upacara Bhuta Yadnya kabuatan desa, lan nitenin sinalih tunggil krama ngelaksanayang Bhuta Yadnya kabuatannya.
2. Indik Bhuta Yadnya desa Adat Tinungan ngemanggehang sastra Agama, dresta tur kapikukuh olih krama manut perarem.
3. Sinalih tunggil krama ngelaksanayang Bhuta Yadnya sane mabuat mangda mesadok ring prajuru.
4. Sang piwal ring pidabdab desa keni dande manut perarem.

SARGAH V

SUKERTA TATA PAWONGAN

Palet 1

Indik Pawiwahan

Pawos 63.

1. Desa Adat Tinungan nitenin sinalih tunggil krama ngelaksanayang pawiwahan.
2. Indik pawiwahan Desa Adat Tinungan ngemanggehang UU No.1 Tahun 1974 lan PP No. 9 Tahun 1975 Indik Pawiwahan.
3. Tata cara penyanggran desa indik pengelaksana Upacara Pawiwahan nganutin ring sastra agama, dresta saha kapikukuh olih krama manut perarem.
4. Sang pacang ngelaksanayang pawiwahan mangda mesadok ring Prajuru.

5. Sang tungkas ring pidabdab desa keni danda manut perarem.

Palet 2
Indik sentana
Pawos 64.

1. Sinalih tunggil I karma adat yen pacang ngangkat sentana patut masadok ring prajuru Adat sanistane asasih sadurung dewasa pamerasanne.
2. Prajuru mretyaksayang kabuatannya saha nyamuakang ring desa adat. Sang rumasa kabratan antuk pamerasan inucap sanistane masengker awuku (pitung rahina) sadurung rahina pamerasan patut nunas bawos ring prajuru adat.
3. Prajuru adat digelis mawosin saha ngicen pamutus tepekang ring daging sastra agama utawi undang-undang miwah daging awig-awig desa adat lan dresta.
4. Prade sulus pamerasan tan manut sastra agama miwah dresta, prajuru adat patut ngandeg sang pacang mekarya saha ngicen panuntun mangda kapuputang ring rahina sewosane sulus utawi wicara. Yening sang pacang ngangkat sentana marikukuhin tatujonnya, patut sang mekarya inucap mangda nunas pamanut ring guru wisersa (pengadilan).
5. Yan sulus tata cara sampun manut prajuru patut nyaksinin saha mastikayang wenten tan wenten brana sakaluwire sane sinanggeh raruntutannya.
6. Selanturnya risampun kaupacarain, prajuru adat digelis nyuratang ring ilikita desa adat miwah nyamuakang ring paruman adat.
7. Risampun kaputus olih guru wisesa prajuru patut nyuratang ring ilikita desa saha kasiarang ring paruman desa.
8. Indik pangerob kasulurang manut pamutus paruman desa adat.

Pawos 65.

Sane wenang kaangkat dados Santana luwire :

- a. Jadma me agama Hindu
- b. Wit sakeng peturunan pancer (purusa)
- c. Matunggalan sanggah / Dadia
- d. Yan tan wenten sakeng pancer (purusa) lan tunggalan sanggah dados sakeng katurunan predana.
- e. Sekama-kama risampun polih pamutus sakeng guru wisesa.

Pawos 66.

1. Yening wenten krama medruwe putra mesengker tigang rahina sakeng embasannya patut masadok ring prajuru adat saha parab pastika.
2. Prajuru Adat ngunggahang sang embas punika ring ilikita desa saha nyuarang kulkul tepakannya : oooooo kelentungan

Pawos 67.

1. Yan wenten kramane kaempakan ngawit sakeng penyakit manular mangda gelis masadok ring prajuru adat.
2. Prajuru adat patut digelis ngelanturang mesadok inucap marep ring guru wisesa.
3. Yan wenten kramane kaempakan masengker aselid patut masadok ring prajuru adat.
4. Prajuru adat ngenggahang sang padem ring ilikita desa saha nyuaraang kulkul.

Pawos 68.

1. Karma sane nampi tamu jantos makolem, patut masadok ring prajuru adat.
2. Perade tamu pacing madunungan jantos langkung ring sawuku prajuru adat patut nureksinin pisan, mungwing kawentenannya miwah babuatannya saha surat-surat karangannya.
3. Bilih yan madunungan jantos lintangan ring asasih suwennya patut kaunggahang manut pararem.

Pawos 69.

Sapa sira ugi jadma tamu lan penumpang mamurug kasisipang luwirwe:

- a. Ring pawos 68, 2 ring ajneg tamu inucap mangda mawali nyangkepin surat-surat sane kemanggehang antuk Guru Wisesa.
- b. Ring pawos 63, 3 ring ajeng tamu punika patut kantunding olih ikrama desa.

Pawos 70.

1. Tamu lan penumpang padem kasulurang luwire:
 - a. Yening jadma tamiulan penumpang padem ring wewidangan desa Adat Tinungan kasulurang manut Pararem.

Palet 3.

Indik warisan

Pawos 71.

- 1) Desa Adat Tinungan nitenin sinalih tunggik I krama nyulurang warisannya.
- 2) Indik warisan desa adat ngemanggehang uger-uger jagat nganutang ring dresta desa.
- 3) Sang pacang nyulurang warisan mangda masadok ring prajuru.
- 4) Sang tungkas ring pidabdab desa keni danda manut perarem.

SARGAH VI.
WICARA LAN PAMIDANDA

Palet 1
Indik wicara

Pawos 72.

1. Sang wenang mawosin mekadi mutusang wicara ring desa adat Tinungan luwire : Prajuru desa adat prade sang mewicara atunggalan adat. Pamutus prajuru adat marep ring wicara inucap sinanggeh wasaning bebawos nepekang ring awig-awig lan perarem desa adat.
2. Prade sang wicara tan wenten cumpu ring tata cara prajuru desa adat, mawosin sang inucap kengin nunas tetimbang ring prajuru desa adat.
3. Prade sang mewicara taler tan cumpu ring pamutus kertan desa kengin nunasang ring guru wisesa / pengadilan.

Pawos 73.

1. Sahanan wicara mawiwit kacerahan sakaluwire, miwaha sinanggeh nungkasin daging awig-awig, miwah perarem-perarem desa patut digelis kabawosin tan nyantosin pasadok.
2. Sewosan kadi wicara ring ajeng, patut nyantosin pasadok sang nunas bawos.

Pawos 74.

1. Sahanan wicara patut ketepasin jantos pastika janten iwang patutnya melarapan antuk Tri Premana (bukti, saksi lan ilikita).
2. Pamutus patut tan marem nepekang ring catur dresta (sastra, parwa, loka miwah desa dresta) saha medasar antuk dharma tula nyucian lokikha sanggraha.
3. Sahanan pamutus patut tan maren ngupadi :
 - a. Mangda warga desa sayan pastika uning ring wewatesan iwang patutnyane.
 - b. Mangde sang kawon tatas uning ring kaiwangan deweknya.
 - c. Sang kalih tan maren katuntun, mangda sampunang bes nginggilang kepatutannya, lila leghawa nyampurna sang sisip.
 - d. Nyapsap bibit-bibit papinehan mameseh-mesehan.
4. Prade wenten warga desa memandel ring pamutus kadi menggah ring ajeng, bilih-bilih sinanggeh ngawinang duskretan desa patut prajuru desa nunasang pematut ring guru loka, ring guru wisesa.
5. Warga desa sane merasa keberatan ring pemutus prajuru desane wenang nunas bebandingan ring guru wisesa.

Palet 2
Indik pamidanda
Pawos 75.

1. Desane wenang niwakang pamidanda marep ring warga desa sane sisipan
2. Paniwak inucap kelaksanayanga olih bendesa adat
3. Bacakan pamidanda liwire:
 - a. Ayahan panuhun kasisipan
 - b. Danda arta
 - c. Rerampagan(panikel urunan utawi panikel dedendaan)
 - d. Upakara pengaskara
 - e. Kanorayang mekrama
4. Pamidanda sane katiwakang, patut manut ring daging awig-awig, paswaran-paswaran, pararem-pararem lan dresta miwah kecap agama.
5. Agung alit pamidanda sane katiwakang manut pamutus paruman utawi pararem.
6. Jinah utawi raja brana pamidandane dados druwen desa adat manut dadudonan.

Palet 3.
Indik Perampagan.

Pawos 76.

1. Kramane sane langkungan ring tigang paruman patokan amandel urunan, dedendan, wenang kerampag.
2. Tata cara ngerampag kelaksanayang kadi ring sor :
 - a. Kelaksanayang olih prajuru desa, kesarengin olih krama pinaka saksi sanistane tigang diri.
 - b. Sang karampag tan dados ngalengin sang ngerampag saha tan maren sareng nyaksinin rerampagannya.
 - c. Sang ngerampag sangkaning darsana ngambil barang-barang rerampagan inucap akehnya manut ring agung alit utangnyane I karma, utawi nyawenin tanem tuwuh (tetangunan) kerampag.
3. Prajuru desa miteketang mangda barang rerampagan digelis katebus mesengker sia (9) rahina ring sampun jantos dasa rahina rerampagan inucap pacang kalelang.
4. Prade jinah penumbasan rerampagan sane kalelang, langkungan ring gebogan hutang sang karampag patut jinah punika kasuserahang ring sang sane madruwe rerampagan inucap.

Pawos 77.

Rerampagan kasengkerin mangda sampunang jantos :

- a. Ngerampag saka luwire barang-barang sana patut inggilang manut agama Hindu miwah dresta.
- b. Ngicakang cihna kemanusiaan sang kerampag.
- c. Mucahang usaha pengupa jiwa sang kerampag.

Pawos 78.

Sane wenang lan tan wenang kerampag luwire :

1. Sane keni karampag luwire :
 - a. Ingon-ingon suku kalih.
 - b. Ingon-ingon suku pat sejawaning banteng, kebo, misa lan kuda.
 - c. Prabot-prabot, sejawaning prabot pawon, prabot ke carik/tegal miwah prabot siwosan sane mabuat usaha pengupa jiwa.
2. Prade sang kerampag rumasa keberatan nyerahang padruwennyane kengin nunas pematut ring guru wisesa masenger bsia (9) rahina wit kerampag.

SARGAH VII.

SUKERTAN AWIG-AWIG

Palet 1.

Tata kesukertan awig-awig

Pawos 79.

Perarem miwah peswara-peswara :

1. Perarem-perarem desa adat patut ngemenggahang perarem-perarem jagi anggen nyangkepin daging-daging awig-awig nyane nunggal-nunggal manut dedudonan.
2. Daging sehanan perarem-perarem patut sumaih ring daging awig-awig desa adat.
 3. Sane patut keunggahang ring perarem luwire :
 - a. Dewasa ngawitin pemargin unteng daging awig-awig sane mabuat.
 - b. Agung alit danda-danda, panikel-panikel lan selanturnya.
 - c. Tata sultur ngemargiang awig-awig.
 - d. Sehanan indik sewosan sane anggen nyangkepin daging awig-awig inucap.
4. Paruman prajurune wenang ngemedalang paswara-paswara anggen anggen nyangkepin daging awig-awig risampun polih pamutus paruman desa.
5. Daging paswara-paswara tan maren patut :
 - a. Saelon ring daging awig-awig.
 - b. Manut ring catur dresta (Purwa, loka, desa, dresta).
 - c. Pastika nyantenang dewasa pengawit pemargin awig-awig.
 - d. Nyantenang agung alit dedendannya parede kapurug

SARGAH VIII.
NGUWUHIN AWIG-AWIG

Palet 1.

Tata Cara Nguwah Nguwuhin Awig-Awig.

Pawos 80.

1. Nguwah nguwuhin awig-awig puniki kelaksanayang antuk paruman desa adat.
2. Awig-awig desa adat puniki kemargiang ngawit sakeng keingkupan ikrama desa adat sami.

Pawos 81.

1. Sekaluwiring sane wenten sadurung awig-awig puniki wenten mangda keanutang ring daging awig-awig puniki.
2. Sakaluwir sane durung munggah ring awig-awig desa adat puniki kasulurang ring perarem.

SARGAH IX

PAMUPUT

Palet 1

Indik Pamuput

Pawos 82.

1. Desa Adat Tinungan rikala ngemargiang sedaging awig-awig muwah usaha-
usaha desa patut tan maren :
 - a. Saelon utawi mewirasa ring sehanan parayoga sane taler ngawinang wong desane trepti.
 - b. Ngewentenang galah pengaladika lan pengala desa mangde warga desane polih mengupadi pengupa jiwa, nincapang pengeweruh usaha neri-neri sewosan.
 - c. Awig-awig desa adat puniki kalingga tanganin olih Prajuru Adat, Bendesa Adat, saha kesaksinin olih Prebekel Desa Apuan, lan Murdaning pamikukuh.

Pawos 83.

1. Awig-awig puniki kararemin duk rahina ;

LUWIR SANG NGALINGGA TANGANIN

Adat Tinungan

I MADE LENDRA

Saksi-Saksi

Kepala Dusun Tinungan

Kepala Desa Apuan

I MADE LETER

I MADE ARDANA

Ketua Parida Hindu Dharma
Indonesia Kec. Batuiriti

Camat Baturiti

IDA BAGUS OKA SUARTHA

I NENGAH SAYUN,BA

Kawikanin Olih

Ketua BPPLA Kab.
Tabanan

Ketua Parisada Hindu
Dharma Indonesia Kab. Tabanan

I MADE SUANDRA

DRS. I MADE SAMBA

Kepala Kantor Departemen
Agama Kabupaten Tabanan

IDA BAGUS OKA

Murdaning Pamikukuh
BUPATI KEPALA DAERAH TINGKAT II
TABANAN

I KETUT SUNDRIA